

明

史

明史卷二百五十二

列傳一百三

劉璣

胡汝璣

俞俊

才

寬陳震

韓

福

李

憲

王

潔

韓

鼎子守愚

文

貴

馮

清

寧

果

柳

尚義

龍

劉璣字用齊陝西咸寧人成化十七年進士除曲沃

知縣尚教化不任鞭撻縣產棗民有罪令得入棗贖

積至數萬斛值歲饑賑粟不給發棗繼之賴以不困

徵授戶部主事進員外郎督餉大同道經曲沃吏民

相率迎謁圖其像立祠祀焉用侍郎許進薦擢瑞州

知府盜起境內數來侵璣率兵禦之衆潰爲賊擁歸

璣慷慨諭以禍福賊感悟進酒璣酣飲即斲睡帳中
賊大信服明日送璣還其黨遂解散歷知九江衡州
正德二年雍王祐檣薨內官黃中護喪北還供具咸
宿辦中嘆爲能稱之於劉瑾瑾聞其同鄉則喜召爲
太僕少卿明年春遷太常卿踰月進戶部右侍郎其
秋遂代顧佐爲尚書蓋去知府時方一歲璣本佳士
有文學所至治績可稱及是爲瑾所用不能自引退
聲譽頓衰瑾以邊鎮糧料不中程盡遽巡撫及管糧
諸臣三十年以上皆追論播紳破產者數百家商人
輸糧各邊久候未得直者瑾悉傳給後商不復至邊

用大寔遺官覈諸邊屯田增田多者爲能吏蒙賞少
即重罰隨之諸邊騷然發價市糴於近邊州縣俾運
入鎮城車牛夫役追呼徧里閭四民盡失其業璣悉
奉行無敢忤然璣自以屈節中官居常鬱鬱不得志
日飲酒放廢璣欲與言恒沉醉不應卽舍落落無遇
者時劉宇以附璣爲吏部尚書或以王帶餽宇悞達
璣所聞者恠問之其人驚去曰以爲吏部劉乃戶部
耶已張綵自卽署亦一歲中至代宇爲尚書怙璣勢
開門納賂車馬闐咽而璣卒恬漠自如然公卿謁璣
私第率不得見惟璣與綵至卽入飲閣中綵意得甚

出輒揚揚公卿間而璣俛首從其後忸怩而已以故
瑾敗後人頗憐之因其自疏請罪竟得致仕去家居
二十餘年環堵蕭然緼袍脫粟以耕讀自樂鄉人愛
信焉與璣同以外僚驟遷至尚書者有寧夏胡汝礪
麗水俞俊華亭朱恩隴州李善並成化時進士汝礪
由戶部主事再遷知大同府鎮守中官縱其下虐民
汝礪繩之中官怒汝礪即移疾求去吏部惜其才固
留之由是益發舒敢任事劉瑾疾文士儒緩樂用豪
健吏聞汝礪名悅焉汝礪亦以同鄉故求進正德二
年召爲順天府丞明年再遷戶部左侍郎未幾命兼

僉都御史董宣府屯田事四年正月改兵部涖事如
故時屯田多爲勢家所併汝礪履畝丈之得英國公
張懋以下莊田千八百餘頃中官武將侵據者九百
二十餘頃悉籍上之瑾以公侯既有世祿不得復置
莊田令賦民爲業內外鎮守官限田十頃其下遞減
餘亦以賦民今既定瑾欲推行之諸遺喜汝礪奉行
稱指明年二月遂召拜兵部尚書未上卒俊由江陵
知縣擢御史歷山西左布政使正德元年坐貪殘被
諭下撫臣覈治無跡獲免當是時瑾權勢猶未熾俊
訥知必柄國預行結納瑾喜明年春召爲順天府尹

尋中旨擢南京工部右侍郎四年再遷遂爲本部尚
書時俊年幾八十猶乾沒不已日夕冀望異數瑾久
亦心厭以餽問時至故不忍去之明年請告歸先瑾
卒追奪遂不及恩累官河南左布政使諂事焦芳劉
宇以達於瑾正德三年遂召爲南京右副都御史領
操江事明年進南京吏部右侍郎又明年就拜禮部
尚書瑾敗除名善歷兩京御史正德初爲四川布政
使三年瑾以鄉人故引之擢南京右副都御史尋遷
南京刑部右侍郎五年遂代俞俊爲工部尚書踰兩
月瑾誅劾罷

才寬字汝栗遷安人成化十四年進士初爲商河知縣遷知石潞二州由南京刑部郎中遷淮安知府改西安爲人濶達不羈在官好長夜飲而吏事亦不廢劇理繁劇率談笑應之歷河南左布政使正德二年以右副都御史巡撫甘肅寇駐明水湖督副將白琮等出兵擊之斬獲多賜勅獎勞先是沙州屬番相讐殺多叛去數擾邊守臣屢招之不聽至是寬遣百戶董傑往撫犒以布帛羊酒不足傑出私財佐之番酋且卜苦等喜相率聽命還居沙州事聞增寬俸一秩傑進二官明年移撫陝西旋拜刑部左侍郎未任謫

兵部劉瑾喜其才四年擢工部尚書居數月代楊一清總制陝西三邊軍務寬輕率喜野戰閱一清營陣圖笑曰彼書生無勇畧邊兵驍勇自能殺賊賊來驅之使戰何功不成安用營陣焉哉又好用權術倚瑾自恣御下寡恩叅將閻綱遊擊陳善都指揮郭邈並有時名寬惡其擊賊不力褫衣冠被以婦人服俾周行營中由是諸將憤怒莫肯効命其冬賊入花馬池寬令總兵官曹雄副將楊英等自興武營出擊而親率輕騎百餘踵之頗有新獲賊伏兵突自沙窩出從騎皆散流矢中寬墜馬死雄等悉引還賊遂大掠而

去事聞贈太子少保諡襄愍錄一子錦衣百戶其時
有慶陽陳震成化末進士由御史歷山西按察使坐
累謫兩淮運司同知進長蘆鹽運使以疾歸張誅薦
於瑾瑾以同鄉故矯旨起光祿卿直文華殿再遷戶
部右侍郎安化王寘鐸反廷議起楊一清討之瑾以
一清道遠改震兵部先往攝總制事比至賊已平盡
械寘鐸親屬及其餘黨送京師欲以爲已功一清在
道聞之曰事干宗室無上命詎敢擅發且罪人有首
從今槩以爲叛黨而俘之將千餘人無得生者矣急
遣使止之張永抵平涼聞之亦怒比震謁永永詰之

震爲調語媚求乃止未幾瑾誅言官交劾除名

韓福字德夫西安前衛人成化十七年進士知滑章丘二縣召爲御史按宣府大同數條奏軍民利病而廢置之邊人大悅弘治中遷大名知府境內有盜全州縣團操民壯巡警以時更立保甲相檢察久之奸盜屏跡道不拾遺置亭飛譙下州縣民以事詣府者投行李其中事畢携去雖經旬月無犯者政績爲畿輔冠十五年大計羣吏以卓異舉者僅六人福與焉尋遷浙江左叅政以疾歸武宗立言官交薦召爲大理右少卿督保定六府民壯正德二年以右僉都御

史督蘇松糧儲居無何召佐院事明年坐累下詔獄
獄上劉瑾以同鄉故知福立命出之召與語大悅即
用爲戶部左侍郎福故強幹吏所在著能聲至是受
挫爲瑾所援擢遂精心事瑾爲之効力瑾亦時召與
計謀委寄亞於張綏會湖廣以缺餉告命福兼僉都
御史徃理之瑾喜操切福希指益務爲嚴苛湖廣民
租自弘治改元以後逋至六百餘萬石然皆遇灾蠲
免而福欲追徵之乃劾奏所司催科不力自巡撫鄭
時以下凡千二百人奏至舉朝駭愕戶部尚書劉璣
等議如福言詔報曰湖廣軍民困敝朕甚憫之福先

奏留漕粟廣開事例所積既多乃不遵勅旨任意苛
歛先朝詔書已蠲者不爲區別顧濫勅死亡罷免諸
臣甚不稱朕意其令自劾吏部舉堪代者以聞福奉
詔惶懼言臣所徵逋租得二百二十餘萬石已足軍
士數年之用其未徵者乞暫停因引罪求罷乃召福
還四年復命覈遼東屯田福性故刻深而所攜同知
劉玉等又奉行過當軍士不能堪錦義二州軍餘高
真郭成等因脅衆爲亂焚掠將吏及諸大姓家守臣
不能制急發帑銀撫慰之亂始定事聞瑾歸罪鎮巡
官置福不問已而給事中徐仁等極論之瑾迫公議

乃勒福致仕明年瑾下獄籍其貲則福在湖廣時所
餽白金數十萬而封識宛然遂遣戍固原同時有岐
山李憲蒲城屈銓涇州閻潔三人皆進士憲歷吏科
都給事中諡事劉瑾得其歡倚勢凌同列每率衆請
事於瑾盛氣獨前指揮惟意自號六科都給事中時
袖白金入署出示同列曰此劉公所遺也聞者竊笑
憲不以爲耻瑾敗虞禍及亦列瑾六事瑾在獄聞之
笑曰李憲亦劫我手竟除名銓爲兵科給事中瑾以瑾
同鄉阿瑾意請編正德改元以後新例爲書布之令
中外遵守瑾悅許之未幾遷尚寶丞潔歷官御史其

婦翁中官家奴也用是得通於瑾用爲山東提學副使素不習文試士畢愴然莫知去取視前使故牘從其等次試童子則擇字數多者錄之士子傳以爲笑瑾敗銓潔並謫官又有濱州王綸與弟縵先後舉進士兄弟相疾如仇讐性皆殘虐其後又皆自附於瑾綸由給事中出爲江西副使屬吏有不如意輒榜掠至稱其鬚鬢行部遇巨舟不及避執其舟子捷之死者數十人正德初累官湖廣左布政使以瑾力得擢南京禮部右侍郎俄改左副都御史巡撫大同居數月以無事殿人至死爲瑾所惡下獄奪官縵由御史

出爲荊州知府倚瑾勢貪恣無所忌嘗入覲都御史
署其考最下衆以爲必黜然竟不能去自陳捕盜功
特進一秩又賄瑾得賜飛魚服後坐御史時事貶二
官瑾誅削籍

韓鼎字廷器合水人成化十七年進士授禮科給事
中孝宗嗣位陳崇天道公銓選經財用嚴兵衛四事
弘治三年西域貢獅子帝育之禁中鼎疏諫既而通
事馬諫引番人入內府迄暮不歸鼎又切論時皇嗣
未有外廷傳言張后妬不欲帝置妃嬪鼎即再疏請
倣古天子一娶十二女之義慎選幽閒以克六宮不

納掌太常寺禮部侍郎丁永中及少卿蒙以祺俱由黃冠進其徒董素雲等以竊神樂觀祭服事覺遂焚其蔽永中等曲庇之畀請重按其事且用儒臣爲太常素雲等卒得罪已劾祭酒鄭紀貪邪紀坐改南京通政其冬災異求言偕全官陳數事因劾文武大臣十九人於是永中及南京大理卿吳道宏南寧伯毛文等多罷去明年春再以星變求言言者多請去愴邪抑兼并謹爵賞節財用罷不職獎直言革傳奉止齋醮畀因言陛下求言雖切然施行甚少猶虛文也乞以廷臣所陳一一見諸實事庶災變可弭興王祐

杭將婚帝賜淮鹽萬引助其費鼎慮所遣內官擾民
請令所司易費給用帝並嘉納再遷左給事中擢通
政叅議調南京尚寶卿久之以右通政治水安平置
朱家淺諸牌漕汶上萊蕪諸泉隄南旺湖以障泛溢
於是湖下之田民得耕墾流庸復業入爲通政使督
易州山厰正德三年母喪除赴京值劉瑾用事以鄉
人故特擢戶部右侍郎與僉都御史張綏同廷謝鼎
時已老拜起不如儀瑾黨谷大用張永輩竊笑之瑾
大怒及見綏丰姿英毅又皆稱羨瑾乃喜踰二日遂
傳旨罷鼎歸綏竟大用鼎初爲諫官有名至是爲奄

人所引復挫辱而歸遂失其素望子守愚出服除之
歲舉進士劉宇欲其子仁入翰林並守愚傳奉爲庶
吉士尋改兵部主事瑾誅謫濟南通判瑾之伏誅也
言官劾其黨與者內閣則焦芳劉宇曹元尚書則吏
部張綏戶部劉璣兵部王敞刑部劉璟工部畢亨南
京戶部張潔禮部朱恩刑部劉纓工部李善侍郎則
吏部柴昇李瀚前戶部韓福禮部李遜學兵部陸完
陳震刑部張子麟工部崔岩夏昂胡諒南京禮部常
麟工部張志淳都察院則副都御史楊綸僉都御史
蕭選巡撫則順天劉聰應天魏訥宣府楊武保定徐

以貞大同張禴淮揚屈直兩廣林廷選操江王彥奇
前總督文貴馬炳然大理寺則卿張綸少卿董恬丞
禁中孚張禴通政司則通政吳鉞王雲鳳叅議張龍
太常則少卿楊廷儀劉介尚寶則卿吳世忠丞屈銓
府尹則陳世器府丞則石祿翰林則侍讀焦黃中修
撰康海編修劉仁檢討段昊吏部郎則王九思王納
誨給事中則李憲段豸御史則薛鳳鳴朱衮秦昂宇
文鍾崔哲李紀周霖其他郎署監司又十餘人於是
綵論死福謫戍元思震聰訥武恬介黃中海仁憲鳳
鳴鍾除名亨昂開住善岩諒志淳綸直彥奇良器致

仕選以貞禴中孚龍祿銓吳夢袞紀霖九思納誨謫
外朝署爲清

文貴廣寧人成化中進士爲御史弘治末累官右副
都御史巡撫延綏貴小有才好紛更而無遠畧故事
商人中鹽率輸米貴至值歲凶擅令輸直自是塞下
少積儲軍食大絀諸邊墩臺多仍前代之舊築土爲
之其堅與石不異至是貴以爲隘建請架木其中甃
之以甃作窓四周以施箭砲謂可伏兵禦敵自定邊
營達黃甫川延亘千里爲新臺百四十七既成值劉
瑾已用事勞以璽書銀幣正德元年冬遂召爲兵部

左侍郎三年春謀報賊臨邊駐牧連營三十里廷議
設總督大臣乃命貴兼副都御史總宣府大同延綏
三鎮軍樂之聽便宜行事比至賊已退貴欲盡易宣
大墩臺如延綏制乃請許入貲補軍官及生員入監
僧道給牒助修築費又請先貸京帑銀四十萬兩瑾
悉許之乃先輸數萬於瑾第瑾益喜所請無不從其
實貴所造墩臺徒飾觀美敵至縱火焚之木燬甃墜
軍士觸烟焰箭砲卒無所施自是邊防益隳議者恨
焉明年擢右都御史巡撫大同罷總督不設其秋貴
募邊人爲軍請五年放免瑾欲遂令永戍以貴定擬

五年爲嵩擅遂罷歸己而瑾誅言官連章劾貴交通
納賄狀以既致仕不問十三年遼東巡撫張貫薦起
之給事中張漢卿劾貫欺罔不報明年命以故官撫
卽陽未幾改甘肅貴素無物望至是老矣復夤緣受
任朝論譁然巡按御史李獻請罷貴不聽世宗立始
落職歸同時宛平馮清弘治中進士正德七年積官
右僉都御史巡撫寧夏九年甘肅用兵命以戶部右
侍郎兼故官理陝西諸鎮軍餉奏改西安延安慶陽
諸府芻糧皆徵銀輸邊報可先是諸邊改中鹽粟爲
輸直凶歲已苦糴貴猶賴近地濟之自清改折議行

侵牟既易市糴益艱遭計始盡壞後凡言折色之失者必追咎清與貴改墩臺同爲邊人指怨云清身入爲刑部右侍郎久之改兵部出理宣大軍餉召還進左侍郎清善附權勢爲清議所薄世宗立言者交劾罷歸嘉靖六年春寇再入宣府廷議遣大臣經畧大學士楊一清素善清乃起故官總督宣大山西軍務居數月以御史張祿劾復罷歸

甯果遼東海州人舉進士授行人弘治末選御史爲人狡佞以諂事劉瑾驟擢大理左寺丞時方奉使江北復命後期瑾惡之謫潛山知縣尋復以爲御史正

德四年秋瑾以四方盜起建議設四鎮捕盜御史使
挈家赴官期盡賊乃返杲往真定廣平所同遣者柳
尚義順天保定薛鳳鳴江北潘銳江南四人皆無行
而杲鳳鳴尤甚鳳鳴既至宿州與指揮石璽挾妓飲
演武場投壺蹴鞠爲樂瑾知之謫爲徐州弓手而杲
素果驚爲懸賞格立什伍連坐法募曉勇者自將之
頗有捕獲每得賊輒盛軍容鳴金鼓驅之入城屠其
腸斷手足分懸四門有張茂者文安劇盜也招集亡
命劉宸劉寵齊彥名輩縱橫剽掠又結中官張忠爲
兄得潛入禁闥其勢益盛杲率壯士數十人直入茂

家捕得之對衆剖啖其心而去事聞瑾益才果而是
時尚義亦數有斬獲五年春遂擢果左僉都御史尚
義右僉都御史仍專捕盜然果特張皇立威欲以脅
散諸賊而幹畧實寡惟與尚義多殺良民克首功而
已既而尚義逐賊經果地果不與助又功已報者復
列上爲兵部所發已又爲給事御史段豸涂敬所糾
降副使領捕盜事其秋瑾卿人修撰康海奔喪過內
丘盜劫其貲瑾聞之責捕甚急海詭言劫者乃瑾所
寄素有司懼急歛民財償海事得稍解果猶以勘報
遲留再降山西叅議瑾敗罷歸七年流賊劉宸等橫

中原果尚義以重貨賂權勢取中旨起故官而復自
以有罪請下廷議吏兵二部依違不敢爭請仍以副
使討賊帝不從竟命爲僉都御史未幾果代彭澤巡
撫保定諸府盜遏阜城交河發兵追之不及遂掠殺
二縣民百六十餘人至景州逢耕者又殺數十人死
者家泣訴於紀功給事中以聞由是劾者踵至無慮
數十章率爲權倖所庇果聞之笑曰徒勞諸君正使
積疏盈車其奈我何其冬賊已盡平給事中潘瓊等
復劾之乃召果還已而瓊及郎中唐澤勸上具如劾
章時果已遭喪去竟釋弗問十四年復賣緣起撫宣

府南京御史周瑯宣府巡按御史章綸等連章爭之不報果至驟請帑金數十萬足邊儲戶部難之兵部請大臣一人蒞其事乃報可果在鎮二年乾沒無算半入諸近倖及王瓊家瓊庇之故有請輒爲左右世宗即位言官交劾乃下獄論死果稱病丐免左都御史金獻民持不可帝弗納竟戍雷州尚義巴陵進士歷叅政大計罷歸時又有京師人張龍者弘治中舉進士授行人爲人邪媚無賴時壽寧侯勢烜赫龍與通譜系因得偕諸中人貴戚往來恃勢奪人田宅正德三年賣緣爲兵科給事中出覈遼東軍餉得腐豆

四石請逮問監守諸臣於是郎中徐瑾以下罰米三百石有差瑾以爲能擢通政叅議瑾敗被劾謫知涿州遭喪還里日縱酒自如嘗與隣婦通強納爲妾其夫憤投中貴爲廝養欲修怨龍乃置酒中貴家餽金帛携妾往拜酒半膝席請曰龍今爲公新兒定勝公故兒何靳此婦不以與兒耶中貴笑許之其夫乃止服闋起嘉興同知遷登州知府厚賄朱寧結爲父子自是兩京言官糾彈無虛月率以寧故寢不行當是時山西左布政使倪天民右布政使陳達右叅議孫清與龍並務貪殘天下目爲四害而龍尤無耻十一

年朝覲入都乞改京職便養寧主之遂以中旨擢右
通政龍於是日夜趨寧門爲通中外賄而龍所乾沒
亦不貲久之挾寧勢私取賂爲寧所覺大怒始言於
帝遂之嘉靖初被劾下獄論死

論曰易泰之初九拔茅茹以其彙而否之初六亦云
蓋君子小人以類相引自然之勢也世固未有小人
得志而不廣樹私黨者方閣瑾用事屬意其鄉人即
劉璣韓鼎素有才行者猶不免濡足况其他嗜利无
耻者乎厥後嬖倖亂政一時逐臭附羶前後一轍如
寧果張龍即移其事瑾者以事彬寧康耻道喪靡然

從風其始率由一二宵人進用而後乃至於莫知底
極豈非履霜而致堅冰爲深可畏焉者哉

明史卷二百五十三

列傳一百四

陸完

王瓊

張子麟

李鑑

陸完字全卿長洲人爲諸生值中官王敬至蘓州以
事廷曳諸生諸生競起擊之時完實不與而惡完者
中之敬所敬遂首列完名上聞巡撫王恕極論敬罪
完乃得免舉成化末年進士謁選恕方爲吏部曰是
嘗擊奄人者當爲御史入臺果有聲弘治中歷江西
按察使寧王宸濠一見愛重之時召預曲宴以金壘
爲贈且自指其帶字謂之曰全卿他日繫此無疑幸

勿相忘也正德三年冬擢右僉都御史巡撫宣府劉瑾惡完赴關後期命以試職視事居月餘復改南院督江防軍完以都御史試職非故事懼甚亟納賄謝瑾瑾喜遂召爲左僉都御史五年春拜兵部右侍郎未幾轉左瑾敗言者劾其黨附帝不問明年霸州賊劉六劉七等起奉楊虎爲首所至縱橫惠安伯張偉右都御史馬中錫師出無功逮繫論死八月詔完兼右僉都御史提督軍務統京營宣府延綏軍討之行及涿州忽傳賊在固安且逼京師帝召閣臣議命完還軍入衛會副總兵許泰遊擊卻永等敗楊虎等於

霸州斬數百人賊懼南走京師始解嚴指揮賀勇等
再敗賊信安副總兵馮禎復大敗之阜城恭與永分
兵追之又合軍馳擊賊俱敗禽斬各數百人賊遂東
奔圍滄州城且破會劉六七中流矢乃解而南陷山
東縣二十楊虎兵亦北殘威新河於是完顏請濟師
益發遼東山西諸鎮兵逐賊賊益南圍濟寧焚運舟
千二百艘轉寇曹州屯裴子岩禎恭求追擊之再戰
禽斬二千餘人獲其魁朱諒錄功進完右都御史諸
將皆增秩中官谷大用張忠意賊旦暮平乃自請督
師詔以大用總督軍務伏羌伯毛銳克總兵官忠監

神槍統京軍五千人會完討賊時劉六等縱橫沂莒間而楊虎陷宿遷敗淮安知府劉祥於小河執之遂渡河犯靈璧執知縣陳伯安皆縱歸大掠宿州連陷虹水城虞城夏邑及歸德州殘殺不可勝紀邊兵追及之亳州賊退至小黃河渡口百戶夏時隔河設伏虎與其黨掠小舟潛渡伏起蹙之虎溺死餘賊奔河南推劉惠爲首還掠太和大敗副總兵白玉軍死者千餘人旋攻陷沈丘殺都指揮王保執都指揮潘紳軍民死者復千餘北陷鹿邑有陳翰者乞爲惠義子時諸賊魁皆自稱大王次者亦各稱王不相制攝翰

與惠故養子甯龍謀兵無統紀則亂乃奉惠爲奉天
征討大元帥趙鏐副之翰自爲侍謀軍國重務元帥
府長史與龍立東西二廨治事分其軍爲二十八營
以應列宿營各置都督聚衆至十三萬鏐說惠反虎
所爲頗戢其下焚剽中原失業之民益歸之其勢日
甚賊欲牽制官軍於是惠鏐擾河南劉六及齊彥名
等擾山東黨分爲二而六復轉而北掠永敗之濰縣
斬獲八百有奇賊益北還趨霸州帝時將出郊省牲
聞之懼急召完赴援完擊破之文安賊南至湯陰完
又督諸將追敗之先後俘斬千人當是時六等衆號

數萬然多脅從精銳不過千餘人自兵部下首功令於是官軍追賊賊輒驅良民爲領行急則并棄所掠自後逸去官軍所殺皆良民以故捷書屢奏而賊勢不衰明年正月六等復突犯霸州京師戒嚴詔完及大用銳還師近畿防禦賊乃西掠博野攻蠡臨城大用銳與遇於長垣大敗廷議召二人還別命都御史彭澤同咸寧伯仇鉞辦河南賊以畿輔山東賊委完完遣永追擊劉六於宋家莊斬首四百賊南走犯滕縣副總兵劉暉追及大敗之斬千餘級賊遂奔登萊海套完師次平度檄永玉與遊擊溫恭三道進攻而

命副總兵張俊李鉉及恭暉分軍邀其奔逸於渠水等攻賊賊走暉使部將傅鑑張椿左右攻之賊大奔鉉兵亦至合師逐賊賊戰復敗乃變服易馬而遁先後禽斬二千六百餘人賊止三百人北走沿途招聚勢復張剽掠香河寶坻王田轉攻武清遊擊王杲敗沒巡撫寧果部兵遇賊東馬圈亦敗當是時畿輔復震驚而賊轉掠南下至冠縣暉率兵追襲敗之指揮張勛又敗之平原賊窘不能復北南奔邳州渡河抵固始會河南賊已平劉六等勢益衰遂走湖廣由圍風鎮奪舟溯流至夏口遇都御史馬炳然殺之復登

陸焚劫贛口爲指揮滿弼等追及劉六中流矢與子
仲淮赴水死劉七齊彥名率殘卒五百人舟行自贛
州下九江經安慶順流達鎮江南京告急完疾趨而
南朝命彭澤仇鉞會完軍進勦大兵盡集江南北賊
猶乘潮上下長江肆剽掠操江武靖伯趙弘澤都御
史陳世良遇之敗績死者無算七月賊泊舟孟濱完
等至鎮江留鉞防守令恭以騎兵駐江北暉永以舟
師趨江陰完率都指揮孫文傳鎧趨福山港賊懼抵
通州欲登陸通判胡嵩等禦之不能得會颶風大作
舟多壞乃棄舟走保狼山完命同知羅瑋夜導軍登

山賊奔山顛下矢石官軍多傷暉麾軍自山北永自
山南蹙之彥名中槍死七欲奪舟走官軍齊射之被
矢亦赴水死餘賊盡平還朝進完太子少保左都御
史廕子錦衣世百戶明年代何鑑爲兵部尚書完有
才智而急功名善交權勢劉暉許泰江彬皆其部將
後並寵倖用事完遂得其力時宸濠已萌異志聞完
爲兵部則大喜致書盛陳舊好欲復護衛及屯田完
荅書令以祖制爲詞宸濠遂遣人輦金帛鉅萬寓所
善教坊臧賢家徧遺用事貴人而屬錢寧爲之內主
比奏下完遂爲覆請而倖以屯田屬戶部請付廷議

得旨並予之舉朝譁然六科給事中高滂十三道御史汪賜等力爭章並下部完久之不敢覆南京給事中徐文溥繼言之完惕於公議佯請納諫官言帝竟不許中官劉寧劉允徵皇莊租傳白帖索夫廩完不敢違自是中貴有需求公然以白紙行之完悉奉行恐後中外爲之太息十年改吏部尚書江西布政使張嶺忤宸濠完迎其指遷嶺光祿卿遠之凡宸濠欲有所黜陟馳片紙示意無不從者於權倖亦然銓政遂大壞及宸濠反就執中官張永至南昌搜其籍得完平日交通事上之帝大怒遷至通州傳旨執完收

其母妻子女封識其家比還京裸完體反縛竿揭姓名於首離俘囚中列凱旋前部以入將寘極刑值武宗崩世宗立以平賊功援八議乞哀下廷臣覆讞遂得減死戍福建靖海衛母年九十餘竟死獄中初完嘗夢至一山顏曰大武後無所驗及抵戍所恍然夢中所見問之則大武山也嘆曰吾戍已久定何所逃乎竟卒於戍所

王瓊字德華太原人成化二十年進士授工部主事進郎中出治漕河故事並河府縣各設判若丞一人從工部郎董漕其後上官輒檄治他事漕政益弛瓊

至悉不許先是河旁貯埽及芻足支數年瓊爲減徵額歲取十三以其直貯庫脩河緩急再歲贏金三萬有奇都御史欲以餉軍瓊執不與御史移防河材治學舍瓊檄有司趣還之治漕三年臚其事爲志繼者按稽之不爽毫髮由是以敏練稱改戶部歷河南右布政使正德元年擢右副都御史治鹽兩淮分遣官按行所部捕私販及結聚爲盜者官鹽乃稍稍通入爲戶部右侍郎初衡府有賜地三百餘頃悉荒蕪不可耕有司歲勒民出租以爲常至是王反誣民趙賢等侵據其地詔瓊往按瓊遂奪旁近民地四百八十

頃予之而奏除賠納之課由是民失業者三百七十
九戶賢等戍邊人皆寬之三年吏部左侍郎缺官廷
推者三劉瑾皆不用最後推瓊乃用之竟以輸賄不
滿瑾意撫細故出之南京以憂歸七年復爲戶部右
侍郎轉左明年進尚書瓊爲人多心計善鈎較爲郎
時固已悉錄故牘條例盡得其歛散盈縮狀及爲尚
書益明習國計邊帥請芻糗則屈指計某倉某場序
糧草幾何諸郡歲輸邊卒歲採秋青幾何曰足矣重
索妄也人益以瓊爲才然性傾險善事權貴人與錢
寧江彬等深相結十年吏部尚書缺衆推兵部尚書

陸完瓊副之瓊不悅退語其屬出惡聲及完改吏部
中旨以瓊代廷議召彭澤弗用也先是四方盜起將
士率以首功進秩瓊言上首論功羸秦弊政行之邊
方猶未爲失未有勦內地盜賊而論首功者頃因部
臣無識謬議遺紀功官致將士惟貪首功無志破賊
如江西四川諸處妄殺平民何止千萬縱賊滋蔓貽
禍數年行賞拜官迄今未已皆爲謀不臧所致也自
今內地征討惟以蕩平爲功不計首級庶杜冒功之
弊從之瓊在中樞天下士馬多寡強弱及關塞夷險
偏裨才否一覽輒記值南北用兵封章旁午所條荅

區畫悉中機宜帝時遠遊塞外經歲不還近畿盜賊
又竊發瓊請於河間設總兵官一人大名武定各設
兵備副使一人責以平賊而檄順天保定兩巡撫嚴
兵要害爲外防集遼東延綏士馬於行在以護車駕
制置周詳中外恃以無恐然專愎自用好紛更初軍
官死無子許從兄弟再從子承襲弘治末定制自非
弟及從子皆不許至是瓊多納賂遺再疏請如舊章
自後陳乞紛然軍職益濫故事天下清軍御史三歲
一更得之者多不樂瓊徇衆意請永廢其制惟浙江
河南山東山西歲一遣官自是清理無人尺籍益耗

矣瓊之初爲本兵也忌彭澤聲望出已上恐還朝逼
已假邊警阻之御史高公韶不平瓊所爲劾之斥爲
典史潘垾在兵科數有論駁瓊復謫之外已交通朱
寧欲中澤危法都給事中石天柱王爌廷爭之并黜
二人除澤名又以小嫌致雲南巡撫范鏞甘肅巡撫
李昆副使陳九疇於獄由是中外畏瓊不敢少忤凡
四方捷奏上必推功瓊瓊輒爲優叙而瓊亦緣此數
承廕賚累加至少師兼太子太師再廕子錦衣世千
戶及營建乾清宮又廕錦衣千戶者二其他王帶蟒
服上尊珍饌金帛之賜不可勝紀他尚書莫敢望焉

十四年御史蕭淮奏寧王宸濠有不軌謀大學士楊廷和即欲發兵觀變瓊不可及反報至瓊又請覈實乃發兵既知其定反始請勅南和伯方壽祥督操江兵防南都南贛巡撫王守仁湖廣巡撫秦金各率所部趨南昌應天巡撫李充嗣鎮京口淮揚巡撫叢蘭托儀真奏上帝意欲親征持三日不下廷和趣之竟下親征詔命瓊與廷和等居守先是瓊知王守仁才使撫贛州假之便宜至是宸濠反舉朝震驚瓊大言曰諸君勿憂吾用王伯安贛州正爲今日聖子旦夕成禽耳當是時瓊倚寧彬等表裏用事誅賞遷擢多

取中旨不開白內閣廷和弗能堪及帝還至通州張
永與廷和計將發瓊交通宸濠狀外議喧傳家且籍
瓊先馳至行在輸誠帝左右得免遂代陸完爲吏部
尚書帝崩江彬就縛舉朝相慶瓊獨憂懼百官方臨
思善門瓊忽不見或謂出謀於魏彬弟英求彬爲內
援故也世宗入繼言官交劾遂下都察院獄瓊上書
力許廷和帝愈不直瓊下廷臣雜議坐結交近侍論
死諸爲瓊所構陷者皆復官瓊䟽辨言官史道范永
鑒亦請寬之乃減死戍莊浪瓊復自訴年老改戍綏
德給事中許復禮等及御史程啓光執奏以爲不可

弗聽比張璉桂萼霍輜輩用事瓊陰結之萼等以瓊素警廷和亦欲援之益樹黨於是輜首薦之帝不納至嘉靖六年有邊警萼遂力請用瓊給事中鄭自璧御史譚纘等交章論瓊并劾萼吏部侍郎孟春等亦持之遂不果用而帝憫瓊老病令還籍爲民御史胡松因劾萼引用兇邪帝怒謫松外任御史周在復上言陛下罷瓊不用既已行松之言詘萼之議何乃又罪松請宥之以開言路帝益怒下在詔獄萼乃復言瓊前力攻廷和故廷臣羣起排之今邊陲需人而廷臣才力實出瓊下惟其才高是以毀積帝重違萼意

命復瓊尚書待用明年遂以兵部尚書兼右都御史
代王憲督陝西三邊軍務先是土魯番既據哈密數
擾肅州廷議閉關絕貢者四年矣至是其將牙木蘭
爲首連壇滿達兒所疑率衆二千求內屬沙州番人
帖木哥土巴等素爲土魯番役屬者苦其徵求亦率
五千餘人來附甘肅巡撫唐澤以聞詔瓊急赴肅州
議之瓊未至番賊數來寇連爲叅將雲岡等所敗其
引瓦剌寇肅州者遊擊彭濟亦擊退之賊既失黨援
又數不獲利乃獻還哈密求通貢乞歸羈留使臣而
詞多悖謾瓊奏乞撫納帝從兵部尚書王時中議如

瓊請而霍韜難之再下部議議未上會胡世寧代時
中而番賊復寇肅州聲言大舉瓊上其狀又言賊方
悔禍宜俯納其請前後相抵牾世寧以詰瓊瓊乃再
疏陳懇詔還番使通貢如故自是西域復定而北寇
常爲邊患初入犯莊浪瓊分部諸將遮擊之斬數十
級寇退俄由紅城子入掠殺部餉主簿張文明明年
以數萬騎寇寧夏總兵官杭雄敗績已又犯靈州瓊
督遊擊梁震等邀擊斬首七十有奇其秋瓊集諸道
精卒三萬人按行塞下自寧夏抵花馬池旌旗三百
餘里不絕賊聞之徙帳遠遁諸軍乃分道出縱野燒

耀兵而還先是南京給事中丘九仞劾瓊瓊乞罷帝
慰留之及璵等罷政給事中劉世揚御史吳仲等劾
其餘黨咸首瓊帝乃命致仕俄寢前詔遣使慰諭瓊
會番賊大掠臨洮西鄙震動瓊集兵曉以禍福諸番
多順命惟若籠板爾諸族不服乃進兵討之火其巢
斬首三百六十有奇撫降七十餘族錄功加太子太
保瓊在邊戎備甚飭西服土番率十國奉貢北捍
強寇經歲少烽警及是諸番蕩平西陲益靖甘肅軍
民素苦土番番侵暴恐一旦瓊去寇患復生相率乞
守臣奏留於是巡撫唐澤巡按胡明善具陳其功乞

如軍民請帝嘉之優詔獎瓊初帝惡楊廷和疑廷臣
悉其黨故連用桂萼方獻夫爲吏部以阻抑之及獻
夫子告帝不欲授他人久而不補至十年冬帝決意
用瓊乃遣行人賁勅召之南京御史馬駁喬英陳洙
李祺余勉學劉志仁李松何宏陳府宋宜等力詆瓊
先朝遺奸不宜再用帝大怒盡逮下詔獄瓊至即以
爲吏部尚書上言臣在正德朝駁等尚未通籍何由
知臣履歷蓋臣之讐奸餘黨尚有在顯位者臣秉銓
衡非其所利故陰嗾駁等論阻以遂其私請罷臣以
快諸人之憤帝慰諭之駁等亦得還職未幾花馬池

有警兵部尚書王憲請發兵瓊言花馬池備嚴賊必
不能入大軍至且先退徒疲中國憲竟發六千人比
至彰德賊果遁明年秋卒官贈太師謚恭襄是時澤
已先卒矣當正嘉間澤瓊並有材畧然相中傷不已
亦迭爲進退而瓊奸狡險忮以諂附權貴致顯用爲
公論所不容獨議禮諸臣璵等輻輳亟誇揚不置云
張子麟字元瑞，萊城人成化二十年進士除南京大
理評事正德初累官刑部左侍郎劉瑾誅言官劾其
黨附帝不問七年進尚書子麟性柔順無特操頗通
諸嬖佞與時浮沉時錦衣卒恣橫一日關於三法司

道上大理司務林華出不避怒而杖之卒語不遜評
事沈光大復杖而囚之其帥朱寧怒奏二人擅撻駕
前人遂下詔獄自是卒益無忌遇事輒直上部堂呼
子麟輩老尊長子麟輩不敢較反降顏接之寧有親
王注爲錦衣千戶恃勢掠人至死其家訟於刑部子
麟以寧故不敢攝員外郎劉秉監據衆証具獄寧怒
先是刑部獄卒故有傭直後移爲公使錢以囚糧之
贏代之積弊已久寧諷東廠發之逮提牢主事二人
詔獄且言堂官共爲侵牟子麟大懼屬他官覆勘竟
脫注獄寧意解乃寢囚糧事不奏其居官執法多此

類以此得居位踰十年再加至太子太保世宗立省
親歸猶虛位待之已因其請許致仕初伍文定破南
昌從宸濠所得一啓署云刑部尚書臣張子麟謹封
即持示巡撫王守仁巡按伍希儒二人屏不奏至嘉
靖二年御史張鉞按江西始發其事詔下守仁等問
狀守仁等具奏如鉞言且云啓在未叛前當時奸黨
爲宸濠經營布置容有詐爲貴人書啓以欺宸濠而
罔利者故當時不以上聞給事中毛玉御史沈灼等
遂交章駁之玉言稱臣已徵二心何論叛與未叛守
仁等勘事持兩端當罪灼言昔劉裕將篡晉難於發

言中書令傅亮解其意叩扉請見曰臣暫宜還都裕
解亮意不復他言遂成篡謀是裕亮彼此逆謀在一
稱臣間而已今子麟於宸濠乃以亮之示裕者示之
而宸濠亦深解其指故一聞詔書宣慰率意圖逆畧
無忌憚豈不以大臣如子麟輩皆已稱臣納款自計
其行必多腹心內應而決計爲之乎且子麟在刑部
誦諛錢寧妄指平民爲盜賊爲妖言以張寧功殺戮
不可勝數今所犯又萬世臣子之大防非他罪比乞
付法司明正其辟世宗竟免子麟罪僅奪職閒佐十
二年建昌侯張延齡下獄坐子麟正德時斬延齡獄

失出詔巡按御史執赴京師治罪已而釋還年八十有八乃卒

李鏐字時器湯陰人成化八年進士授工部主事治河臨清緝中使私鹽數萬引輸官改刑部歷郎中從侍郎何喬新賑荒山西諭遣諸流民爲盜者開麗澤渠灌田數千頃進鴻臚少卿弘治初言團營不當專委武臣請令文臣兼督帝遂以命馬文升五年應詔陳十二事其請罷西山戒壇尤爲王恕所稱再遷光祿卿歷工部左右侍郎給事中竄舉等嘗劾其不職帝特留之十四年出督延綏軍還言修武備恤民

惠崇節儉等十三事且謂攘外必先治內今顧盛齎
醯嗜宴遊寵雜技以金紫飼異禽以梁肉恐不堪服
示遠人又言四方鎮守中官假進貢以求容悅南則
禽鳥花木北則果蓏馬羸名爲自辦實則擾民乞求
行停罷帝頗納之十七年塞上有警廷議遣大臣經
畧自山海關抵密雲以屬鏈鏈乃修垣墻千五百餘
里營堡二百四十餘所邊關賴之明年還朝會孝宗
宴駕命董作恭陵給事中周璽等以災異論劾大臣
請黜鏈帝不聽正德二年進本部尚書嘗孝宗時庶
政修明劉健謝遷馬文升劉大夏諸正人咸在位鏈

素負才氣頗欲有以自見至是劉瑾竊權一時賢者
屏去已盡鑪乃悉反其所爲專務容悅武宗方事宴
樂諭明歲元夕張燈悉更新製鑪乃阿意上奏請先
期徵四方物料自是歲所費鉅萬計供億徧天下寧
王宸濠聞之別爲奇巧以獻且使其人入宮陳設其
燈皆傳辟柱輝煌如白晝近侍縱火樹助其樂遂延
燒乾清宮帝時在豹房觀之笑謂左右曰佳哉此一
棚烟火也論者追咎鑪不能以職事諫流禍至此其
秋修南苑鑪請開事例濟工軍民及陰陽僧道醫士
皆得納貲授官令下大名知府石祿召納獨多鑪言

令出未半歲而祿所上已二萬三千餘金宜亟進秩以風勵天下遂加祿叅政明年鏐以病歸五年中官張永自寧夏班師過湯陰鏐敝衣冠束玉帶跪迎於路永驚曰何至是鏐求復用永還言之吏部以故官徵鏐爲人善窺時變時劉瑾已死朝事稍清鏐亦時用強直取名七年帝命增建豹房鏐言豹房之建造今五年費帑金已二十四萬今又增建二百餘間費將安出乞從停減已命改太平倉爲鎮國府以居邊軍鏐又執不可忤旨詰讓中官劉養賢大工鏐與議事不合面折之一時頗見稱是後權倖益用事遂不

敢顯爭時土木繁興經費不給錢請復開納貲事例
至九年議建乾清宮計費當百萬錢請遍派之天下
由是怨譟交作咸指咎錢而奄豎用事者又率假大
工牟利南城新房太素殿大慈恩寺東敞御馬監鐘
鼓司諸工雜然繼作錢一切不敢違雖或上章有所
爭執止具文塞責以故諸權倖咸安之中官張淮廖
鑾父死既贈都指揮使復以祭塋請故事都指揮不
當賜塋錢援都督僉事例竟予之中官欲建祠墓寺
觀者錢又竊遺以官木由是其位益固加官自太子
少保至太子太保麟服蟒衣之賜時至及乾清將舉

工與江彬錢寧等俱廢錦衣世千戶者二時人多竊
笑鏃偃然不辭也世宗即位言者踵至始罷歸鏃前
後在工部近二十年所值將作大役以十數與巨奄
共乾沒莫之詰難又時時索諸司貨賂積貲無算家
居爲盜所刼捕獲得巨鏃所鑿陵工殿工字故在天
下聞而嗤之卒贈太保諡恭敏後以給事劉世揚言
奪其諡

論曰陸完王瓊勦寇禦邊頗著勞績能矣然生平險
忮性成老死弗悔睚私比匪無所不爲其殆奸人之
尤者與張子麟李鏃竊位最久畧無善態則又所謂

穿窬之徒也已

明史卷二百五十四

列傳一百五

何鑑

馬中錫

陳金

俞諫

洪鐘陳鎬

馬昊

何鑑字世光浙江新昌人成化五年進士時方選給事御史年未三十者不得與鑑年二十八或勸增年以應鑑曰是欺也不可授宜與知縣徵拜御史巡宣府大同劾巡撫鄭寧以下數十人不職按禪將孟壘等罪邊陲清肅還巡太倉總督太監麾下卒犯法逮治之爲所構下錦衣獄得釋再按江北鳳陽皇陵所近境取寸木法皆死陵軍多倚禁虐民鑑請止限

山麓他樵採勿禁遂著爲令出爲河南知府仍歲大
饑盡出庫金易黍豆分賑而備條荒政十事行之民
爲立祠歷四川左右布政使弘治六年以右副都御
史巡撫江南兼理杭嘉湖三府稅糧明年蘇松大水
民饑用便宜發漕米十五萬石賑之屢奏便民事宜
多報可與侍郎徐貫疏吳淞白泖諸渠泄水入海水
患用除復巡撫山東闕里文廟故金章宗時所建規
制庠隘至是災鑑請於朝拓而新之損濱河州縣役
夫懲臨清德州倉之攬納者十二年遷刑部右侍郎
出勘樂平王安泛獄遣賑山東及徐邳饑民皆稱旨

進左侍郎母憂去十八年還朝時承平久生齒日繁而孝宗覽天下戶籍見其數視國初反減咎所司不能奉職欲釐正之勅鑑以故官兼左僉都御史往河南湖廣陝西閱實戶口鑑周歷州縣悉心詳覈得戶二十三萬五千有奇口七十三萬九千有奇因疏善後十事及所見軍民利病以聞會孝宗已崩武宗悉採納之正德二年拜南京兵部尚書鑑前撫江南嘗按千戶張文冕罪文冕亡去至時構鑑於劉瑾而瑾亦嚙鑑不與通遂坐松江折布事罰米七百石又誣以修文廟乾沒罰千石貧不能償戶部爲請獲免六

年召爲刑部尚書時大盜並起劉寵劉宸楊虎劉惠
齊彥名朱諒等亂畿輔方四曹甫藍廷瑞鄢本恕等
躡四川汪澄二羅光權王浩八王鉦五等擾江西皆
擁衆稱王攻剽遠近四方告急無虛日遭戎備久弛
人不習戰賊所至將吏率望風奔潰甚至開門延款
人情恟懼不寧而兵部尚書王敞籌筴無所展帝既
命洪鍾陳金馬中錫督師分討其年四月復罷敞以
鑑代之鑑乃選將練兵嚴號令公賞罰募義勇檄府
縣繕濬城隍蒐補軍實錄用民間材勇士毋使遺以
資賊鄉聚悉樹柵浚溝團結相救河南山西發兵守

黃河新太行防賊奔突京操班軍留守所在城邑漕
運卒每艘簡一人屯河濱護運道通行旅文武大吏
不能禦賊請勅峻責之而褒進縣令之能擊賊者所
布置皆中機宜以中錫擁兵玩寇奏遣陸完代還內
地兵弗任戰則調遼東宣府大同延綏諸將士從完
討賊賊狃於屢勝輕官軍至是連爲邊軍所破始
懼而南奔而中官谷大用謀冒功取封拜復偕伏羗
伯毛銳出督師賊覘知銳等駐臨清去京師遠將以
十二月朔伺帝省牲南郊犯車駕遂先一日趨霸州
一夜羽書至鑑立草奏叩禁門傳入達御前而下令

九門嚴守禦馳檄通州良鄉涿州各治兵爲備又依
常制調禁軍營南海子蘆溝橋羊房角諸所既定夜
漏已五下厥明帝召問駕可出否鑑言臣已有備當
早出安人心帝從之成禮而還賊知有備乃西掠保
定諸州縣以去時權倖用事各使子弟蒼頭從軍冀
冒功賞會河南巡撫鄧璋以賊劉惠等來犯請濟師
鑑因集廷臣上議山東之賊不及萬人征討官軍奚
啻十倍所以南北出沒未即就會者以勢要私人營
充頭目撓律攘功故將士離心莫肯効命請令大用
等盡遣若屬還京都指揮以下失事者即軍前行戮

而益調邊軍赴河南助璋進討帝悉從之尋以捷書
屢聞加鑑太子少保明年正月諜報賊突犯霸州京
師戒嚴鑑計遣兵續調者已至涿州令亟趣邀賊賊
聞遁去是時賊渠楊虎朱諒已死其黨分部擾山東
河南鑑請降勅督厲諸將申明賞格以山東賊劉寵
劉宸齊彥名等責遣將許泰卻永劉暉李鏐以河南
賊劉惠趙鏐邢老虎等責遣將馮禎時源神周金輔
令并力一心克期盪滅未幾毛銳敗績于長垣與大
用俱召還鑑乃請用彭澤與仇鉞同辦河南賊而以
山東賊專委陸完自是諸路類有克捷五月河南賊

平七月山東餘賊亦平而陳金洪鐘亦以次平江西
四川諸賊帝喜加鑑太子太保詹子錦衣世百戶鑑
乃上言羣盜幸已蕩平但民罹兵久井里蕭條加之
饑饉不堪復有誅求况脅從解散者尚多反側苟一
夫失所相煽而起禍且難量乞量免田租多方賑贍
黜貪殘長吏傳不急工役以安民生保邦本又請還
民故業貸以牛種復其家三年有以舊事告訐及怙
惡不悛者並寘於理帝悉報可先是七月中鑑以羣
盜未盡請留邊將劉暉戍山東時源戍河南卻求戍
畿輔李鑑戍淮揚各假總兵之職俟事寧而罷仇鈺

則言邊軍久勞風土不習人馬俱病今賊已漸平請
留三之一討賊餘悉遣還廷議言二人議俱是請四
將各留兵千人鎮壓他將許泰神周金輔溫恭輩俱
統所部還邊鎮帝許之命延綏軍徑還遼東宣府大
同軍過關勞賜帝時好弄兵羣小寵幸者言邊軍慙
健過京軍遠甚宜留之京營帝以爲然至十一月三
鎮軍畢至遂命留之以京軍往代鑑力陳不可廷臣
集議復極言其害帝竟不從自是邊軍於大內團操
號爲外四家軍而江彬進用矣八年宣府送迺北降
人脫脫太等至京命充御馬監勇士鑑等上言漢魏

徙氏羗於關中郭欽江統皆勸晉武早絕亂階符堅
處鮮卑於漢南苻融亦慮其窺測虛實今使降人出
入禁中豈無窺伺假寵踰分且生慢侮萬一北寇聞
之潛使點賊僞降以爲間諜寧不爲將來患哉帝不
聽時寧王褒濠謀復護衛鑑力遏之都督白玉以失
事罷厚賄豹房諸倖臣求復鑑又執不從諸倖臣因
嗾校尉訶事者發鑑家僮取將校金錢言官遂交章
劾鑑致仕去閏九年卒年八十鑑誠實果敢遇事當
爲不避利害親歿廬墓家居講求鄉邑利病必興
乃已衆爲之立祠顏曰鄉德

馬中錫字天祿故城人父偉爲唐府長史以直諫忤
王械送京師寘其家人獄中錫以幼免乃奔訴巡按
御史御史爲言於王其家獲釋復奉母走京師訴寃
父竟得白終廬州知府中錫舉成化十年鄉試第一
明年成進士授刑科給事中萬貴妃弟通驕橫中錫
再疏斥之再被杖公主侵畿內民田奉命往勘以其
田還民又劾中官汪直違忤數事直怒使人訶之無
所得歷陝西副使督學校弘治五年召爲大理右少
卿南京守備中官蔣琮與兵部郎中婁性指揮石文
通相訐詞所連及至數百人朝廷嘗遣官往按琮不

服乃改命中錫偕司禮太監趙忠等往一訊得實性
除名琮亦下獄抵罪九年擢右副都御史巡撫宣府
劾罷貪髦總兵官馬儀華鎮守以下私役軍士使隸
尺籍糧馬利爲勢家所擅者歸之官故事軍民擅出
入居庸關有禁至是漸弛奸人得往來無忌中錫請
置籍必巡撫給券乃行既而鎮守中官劉清奏其不
便事竟中寢寇嘗犯邊督軍敗之引疾歸中外交薦
武宗即位起撫遼東軍衛屯田率爲勢家侵奪而軍
士受虛籍代之輸租中錫疏諸朝還田於軍鎮守太
監朱秀廣置官店擅馬市厚自豐殖諸將因之侵牟

萬狀中錫劾秀罪其爪牙權豪歛戢正德元年入歷
兵部左右侍郎劉瑾初得志其黨朱瀛冒邊功乞錄
用緣引至數百人尚書閻仲宇已許之中錫獨持不
可瑾大恚矯旨改南京工部明年勒致仕其冬以遼
東芻粟有腐者逮繫詔獄已械送遼東獄責家不輸
償遼人素德中錫相率欲代輸中錫曰此適重吾罪
耳固謝之盡鬻其產償焉閱三年事竣仍斥爲民瑾
死起撫大同中錫居官廉所至革弊任怨以故有名
六年賊劉六等起所在守臣不能制吏部尚書楊一
清建議遣大臣節制諸道兵乃薦中錫爲右都御史

提督軍務與惠安伯張偉統禁兵南征六名寵其弟
七名宸文安人也兄弟並驍悍善騎射先是有司患
盜召寵宸及其黨楊虎齊彥名等協捕頗有功會劉
瑾家人梁洪徵賄於寵等不得誣爲盜瑾遂遣寧果
柳尚義繪形捕之逮繫妻挈破其家寵等窮蹙乃投
大盜張茂爲之羽翼時出剽掠茂家有高樓重屋樓
僻深害素招集亡命爲逋逃主宦官張忠居與茂隣
茂結之爲兄因賣緣徧賂馬永成谷大用于經輩得
出入豹房侍帝嬖鞠而乘間爲盜如故後數爲河間
恭將袁彪所敗茂窘求救于忠忠置酒私第招茂彪

東西坐酒酣舉觴屬彪字茂曰彥實吾弟也自今務相善毋相厄又舉觴屬茂曰袁公善爾爾後慎毋犯河間彪畏忠唯唯而已已茂爲寧果所擒寵等相率詣京謀自首逭罪忠與永成爲請於帝且曰必獻萬金乃赦寵宸不能辦令楊虎潛出行剽冀以足所獻會虎焚官署寵宸知事不就逃去既而瑾誅有詔許自首諸人乃出詣官兵部奏赦之令捕他盜自効而諸人憚要束未幾復叛糾黨日衆所至陷城殺將吏中錫等受命出師敗賊於彰德既又敗之河間進左都御史然是時賊勢方熾諸將率畏懦莫敢當鋒或

反與之結。叅將桑王素受賂。嘗猝遇文安村中。寵宸跳匿民家樓上。欲自剄。王故緩之。有頃。齊彥名持大刀至。殺傷數十人。大呼抵樓下。寵宸知救至。彎弓注矢以出。射數人皆殪。王大敗。叅將宋振禦賊衆強與賊交。私不發一矢。城遂陷。死者七千人。當是時。寵宸等自畿輔犯山東河南。南下湖廣。抵江西。復自南而北。直窺霸州。楊虎等由河北入山西。復自西東抵文安。與寵等合。破城邑百數。縱橫數千里。所過若無人。中錫雖有時望。然不習兵。偉亦執袴子。見賊強而諸將怯。度不能破賊。乃議招撫。謂盜本良民。由酷吏

竇果與中官貪黷所激若推誠待之可毋戰降也遂下令賊所在勿捕遇勿邀擊饑渴則食飲之降者待以不死賊聞欲就撫相戒毋焚掠顧猶豫未定而朝廷以京軍弱議發邊兵中錫欲戰則兵未集欲撫則賊時向時背終不得要領徘徊却顧然既已建議主撫不能變也寵等聞遣兵且至退屯德州之桑園中錫肩輿入其營與之酒食開誠慰諭之衆拜且泣迭起爲壽寵慷慨請降宸乃仰天咨嗟曰騎虎不得下今奄臣柄國人所知也馬都堂能自主乎遂罷會而是時詔旨方懸賞格購賊寵等偵知益疑懼徑去焚

掠如故獨至故城相戒毋犯馬都堂家由是中外騰
謗謂中錫顧家慮賊戕害故主招撫言官交章劾之
降詔切責中錫猶堅持其說以請兵部尚書何鑑謂
賊誠解甲則冀死即不然毋爲所誑既而寵等終不
降乃遣侍郎陸完督師而召中錫偉還初中錫受命
討賊大學士楊廷和曰彼文士耳不足倚也竟無功
與偉同下獄論死中錫死獄中偉革爵十一年巡按
御史盧雍追訟中錫冤謂賊實聽撫僉事許承芳忌
之潛請益兵以疑賊心及賊再受約方至軍門而檻
車已就道矣朝廷乃復中錫官賜祭予廕

陳金字汝礪應城人徙武昌祖坦夔州知府父琳廣西僉事金舉成化八年進士除婺源知縣擢南京御史十七年以災異率同官劾南京侍郎劉俊馬顯李本祭酒王俱父憂去弘治初改北出按浙江冬月屬邑有雷電之變䟽請側身修行任正人納直諫疎文網寬征徭雪冤抑信號令黜陟兩京文武大臣報聞還掌法司讞牘又因災異偕同官奏請稅已蠲者勿徵禁貴戚毋妄乞莊田而劾内外文武大僚十九人於是掌太常寺侍郎丁永中南京大理卿吳道宏南寧伯毛文等多罷去尋遷山西副使歷雲南左布政

使督兵討竹子箐叛苗平之十三年就拜右副都御史巡撫其地孟養酋思祿與孟密酋思棟構兵積年金奉詔發緬甸干崖隴川南甸諸部兵聚糧十二萬爲征討計而遣叅議郭緒往撫之思祿懼遂罷兵修貢金以功賚銀幣貴州兵敗賊婦米魯米魯退攻平夷衛及大河扼勒諸堡金發兵連破之增俸一等雲南既有鎮守中官復命孫叙鎮金齒騰衝金力爭不聽滇池溢沒官民田築堤障之十七年召爲兩京戶部右侍郎正德改元給事中周璽等劾不職大臣金與馬有詔留任尋以右都御史總督兩廣軍務劉瑾

遣中官韋霽盡輦兩廣庫藏銀貨輸京師惟梧州軍
資庫留三之一金以時方用兵請各存其半乃命輸
五十萬餘俱留之馬平洛容獐賊猖獗金偕總兵官
毛銳發兵十三萬征之俘斬八千餘人進左都御史
靳藤峽苗賊時出剽掠金謂絕之則患溢滋苗嗜魚
鹽可以利縻也乃立約束令民與苗市易峽名曰永
通苗性貪而黠初猶陽受約既乃不予直殺掠益甚
潯州人爲之語曰永通不通來楚江中誰其作者噫
陳公蓋咎金失計也三年遷南京戶部尚書明年召
爲左都御史未聞命以母喪歸六年春江西盜起詔

起復金故官總制軍務南畿浙江福建廣東湖廣文
武將吏俱隸焉許便宜從事都指揮以下不用命者
得專刑戮當是時撫州則有東鄉賊王鈺五徐仰三
傅傑一楊端三等南昌則有姚源賊汪澄二王浩八
殷勇十洪瑞七鄒成七等瑞州則有華林賊羅光權
陳福一等而贛州大帽山賊何積欽等又起皆據險
出剽掠遠近騷然官軍累年不能克金至以屬郡兵
不足用奏調廣西狼土兵明年二月首進兵東鄉遣
叅議徐蕃等分屯要害而令副總兵張勇統官兵土
官岑瑩岑猛統目兵分道並前擊賊於熟塘進戰南

璚皆破之又追敗之於赤岸蔭嶺禽仰三賊鉅五等
克二百六十五柵斬首萬一千六百餘級俘七百五
十餘人五月移師姚源令叅政董朴吳廷舉等各統
一軍列營餘干安仁貴溪鄱陽樂平遏賊出入而親
統大軍搗其巢勇十重剗死會張勇以目兵至張壽
弩射賊瑞七成七等亦斃俘斬共五千餘人餘賊潰
遁七月乘勝進擊光權斬之華林賊盡平又督副使
王秩等進擊大帽山賊獲積欵俘斬千七百餘人半
歲間勦賊幾盡遂即東鄉立縣并立萬年縣招降人
居之前後每奏捷音天子輒賜璽書嘉勞賚銀幣加

官太子少保詹子錦衣世百戶顧金雖累破劇賊然所用目兵貪殘嗜殺時剽掠民間甚於賊有巨族數百口閭門罹害者所獲婦女率指爲賊屬載之數十艘而去民間謠曰土賊猶可土兵殺我金亦知民患之以方倚其力不爲禁而金又未能持廉軍資頗有私入功雖多士民皆深怨焉東鄉之役塗兵縱弩射趨捷若飛賊大窘塗兵要賞千金金靳不予乃縱賊使逸桀黠者多不死糾聚尚數千人金急欲成功遂下令招撫其破姚源賊也金喜謂功在旦夕與將吏置酒高會賊覘知諸要害皆無守者乃悉所有賂目

兵得乘暮遁去時賊絕饗已三日自分必死沿途棄
糴弱散婦女及抵貴溪始得一飽食遂轉掠衢徽間
金知失策亦下令招降賊首王浩八等故僞降以緩
官兵而攻剽如故卒不能盡賊由是紀功給事中梨
真及兩京言官交章劾金乃召金還以俞諫代金遂
請終喪去十年再起督兩廣軍務府江賊王公珣等
爲亂金集諸道兵偕總兵官郭勛等分六路討之斬
公珣及其黨六千餘人俘獲千五百餘人捷聞加少
保太子太保廕子如初復以饒平奏捷詔子先受廕
者進一秩金承召還朝道得疾歸詔強起之十四年

冬入掌都察院事世宗立請老命乘傳還久之卒

俞諫字良佐桐廬人父蓋舉進士官御史出按畿輔中官傅恭家衆豪敗民田蓋勘歸之民劾奏恭罪其黨再按江西外戚王氏萬氏宗族皆在部內多恣橫蓋執而治之坐吉安知府許聰事謫澧州判官覈間田數十頃以業貧民建義倉積粟備賑大築陂堰溉田可萬頃累遷鄖陽知府亦以政績聞諫舉弘治三年進士授長清知縣擢南京御史遷河南僉事嵩縣賊呂梅作亂討禽之歷江西叅議平大帽山賊鍾仕高遷廣東副使中道召爲大理少卿正德六年擢右

僉都御史治水獲杭諸府修治圩塘民享其利尋進
右副都御史提督操江八年春姚源降賊王浩八叛
詔以諫代陳金督江西浙江福建諸軍討之時浩八
衆萬餘屯浙江開化爲同知伍文定等所敗遁還江
西德興以所執都指揮白弘江洪爲質求撫于按察
使王秩秩受之爲傳送姚源浩八奔據貴溪裴源山
餘衆復集連營十里諫令秩與副使胡世寧叅政吳
廷舉列屯要害斷其歸路而躬與都督李鑑乘夜冒
雨潛進大破之俘斬數千人遂擒浩八其黨劉昌三
等潰走玉山據險屯守諫合南贛巡撫周南江西巡

撫任漢軍擊之賊復大敗俘斬七百餘人昌三等走匿西源爲萬年知縣陳攬所獲餘賊千餘人復奔姚源與賊首胡浩三合諫督廷舉及副使楊沐李情等合兵進勦賊黨忽自相關浩三殺其兄浩二衆亂廷舉等因進兵逼之遂擒浩三俘斬四百餘人當是時賊勢蹙亟乘之可立盡諫既鑒陳金之失一意用兵而任漢素畏愼先爲布政使嘗贊成金計意主撫納持議與諫左故雖亟上首功而追賊緩致姚源東鄉餘黨復起先是東鄉賊艾姑七樂庚二等爲陳金所敗乞降隸胡世寧麾下號新兵姚源賊掠開化得之

助討遂沿途剝刻懼罪復叛守臣匿不奏臨川民陳琦等入聞於朝帝以責諫諫乃遣叅將桂勇等分道討之擒茹七庚二脇從解散萬年雖立縣顧賊類尚衆陰懷反側吏胥又多賊黨官府動息必知之副使李情治峻急衆益怨欲叛去獨畏李鑑在餘干不敢發會鑑卒王垂七胡念二等遂作亂殺情及饒州通判陳達秦碧指揮邢世臣等公私廨舍焚毀殆盡諫聞發兵掩擊重七等就擒亂乃定時言官劾諫及任漢周南請治罪兵部因言兵事惡牽制請召漢還命諫兼領巡撫責以討賊詔從之明年遂進擊臨川賊

斬其魁陳玖譚懿而遣叅將李隆擊新淦賊賊踞萬
山中其魁張元二鄒仕興朱奇龍曾受伍等僭稱王
流毒且八年所戕殺不可勝計至是隆等深入擊破
之元二等悉就禽俘斬千七百餘人錄功進諫右都
御史巡撫如故劇賊徐九齡者初嘯聚建昌縣之醴
源已出沒江湖間肆劫掠積三十年黃州德安九江
安慶池州太平諸府咸被其害後雖受撫縱掠自如
諫督兵討之九齡率其黨奔湖廣復遁還醴源諸軍
隨而蹙之九齡授首自是羣盜悉平而寧王宸濠方
蓄逆謀驕恣甚以諫彊直不附已深嫉之陰諷所善

御史張鰲山劾諫十一年召還遂乞致仕嘉靖改元用薦起故官總督漕運先是青州礦盜王堂等起顏神鎮流刼東昌兗州濟南都指揮楊紀及指揮楊浩等追擊之泰安浩力戰死紀中藥僅免賊乃焚掠魯橋谷亭諸鎮東土大震詔責山東將吏於是諸臣分道逐賊賊不復屯聚往來刼金鄉魚臺間且戰且行至苟村諸道兵大集就圍之俘斬數百餘賊突至曹州欲渡河不得乃復掠考城並河西岸至東明長垣於是河南及保定守臣咸告急已賊黨王友賢等轉掠祥符封丘諸縣南抵徐州勢益熾廷議以諸道巡

撫權位相將宜令大臣總統乃命諫與都督魯綱並提督兩畿山東河南軍務以便宜節制諸道兵討之賊復流至考城官軍方欲擊賊河南新募降賊張進引三百騎馳至中都留守顏愷遂勒兵與俱前方戰進忽三麾其旗遽先却賊乘之官軍大潰將士死者八百餘人明年諫等會諸道巡撫連營齊進賊始滅其秋召掌都察院事踰年卒官贈太子太保諡莊襄洪鐘字宣之錢塘人成化十一年進士爲刑部主事曉習律令尚書林聰器之凡諸司奏章及疑獄悉以屬鐘再遷卽中奉命安輯江西福建民復業者還言

福建武平上杭清流永定江西安遠龍南廣東程鄉
皆流移錯雜習關爭相尚以力故易亂宜及平時令
有司立鄉社學教之詩書禮讓時建其言弘治初再
遷四川按察使馬湖土知府安鰲恣淫虐土人婦女
稍美輒逼淫之將婚必請命或至老不敢嫁殺無辜
且數百人掘塚墓焚廬舍甚衆讎家訐奏有司利其
金輒掩覆遷延餘二十年僉事曲銳惡之請巡按御
史張鸞按治鐘贊其決捕鰲送京師寘極刑安氏自
唐以來世有馬湖至是改流官一方始靖歷江西福
建左右布政使十一年擢右副都御史巡撫順天整

飭薊州邊備建議增築塞垣自山海關西北至密雲
古北口黃花鎮直抵居庸延亘千餘里繕復城堡二
百七十所悉城緣邊諸縣因奏減防秋兵六千人歲
省輓輸犒賚費數萬計所部朔河川去京師二百里
居兩山間廣百餘丈水漲成巨浸水退則坦然平陸
寇得長驅直入鐘言關以東三里許其山外高內庫
約餘二丈可鑿爲兩渠分殺水勢而於口外斜築石
堰以束水置關堰內守以百人使寇不得馳突可免
京師北顧憂且得屯種河濡地兵部尚書馬文升等
請從之比興工鑿山山石崩壓死者數百人御史戈

福給事中馬子聰等連章劾鐘巡按御史張烜及兵部並請罷役帝皆不聽未幾鐘奏工成命侍郎張達偕司禮中官往視還言石洞僅洩小水且地近邊垣多沙石不利耕種於是給事中屈伸等劾鐘欺妄三罪諸言官及兵部皆助爲言請逮鐘下吏帝終以鐘爲國繕邊不當罪內閣劉健等亦保持之第停俸三月正德初由巡撫貴州召督漕運明年就進右都御史先是蘓松浙江運舟由下港口及孟漬河沂大江以達瓜洲遠涉二百八十餘里往往遭風濤鐘言孟漬對江有夾河可抵白塔河口舊置四牐徑四十里

至宜陵鎮再折而北即抵揚州運河開濬爲便從之
改掌南京都察院就遷刑部尚書歷左都御史掌院
事五年春湖廣歲饑盜起命鐘以本官總制軍務陝
西河南四川亦隸焉沔陽賊楊清丘仁等僭稱天王
將軍出沒洞庭間圍岳州陷臨湘官軍屢失利鐘至
檄布政使陳鎬及副使蔣昇都指揮潘勲往討俘斬
八百餘人破滅之鎬應天進士既滅賊就遷巡撫右
副都御史傳檄解散餘黨湖湘底寧焉初鐘掌院時
劉瑾方熾及瑾誅言官劾鐘徇瑾至撻御史張威朝
議以鐘方受命討賊四川置不問時保寧賊藍廷瑞

自稱順天王。即本恕自稱割地王。其黨廖惠稱掃地王。衆十餘萬。置四十八總管。攻城殺吏。延蔓陝西、湖廣之境。所在震動。廷瑞與惠謀。據保寧。本恕謀據漢中。取卽陽。由荆襄東下。巡撫林俊方議。過通江而惠已至。攻陷其城。僉事錢朝鳳等倉皇遁去。適官軍自他縣還。賊疑援兵至。亦遁。俊益發獍狃及石砭土兵助朝鳳進剿。叅議公勉仁亦引兵會。時龍灘河漲。賊半渡。獍狃奮擊之。賊敗擒斬八百餘人。墜崖溺水甚衆。俊復遣知府張敏、何珊等追之。獲惠餘衆奔陝西。西鄉鐘乃下令招撫歸者萬餘人。既而賊收集散亡。

攻陷營山殺僉事王源明年縱掠遂劍二州詔趣鍾
進兵鍾乃赴四川與俊議多不合軍機牽制兵不以
時發賊益熾已乃檄陝西湖廣河南兵分道並進湖
廣兵先追及於陝西石泉廷瑞走漢中都指揮金冕
以兵圍守之賊食盡時陝西巡撫藍章方駐漢中廷
瑞遣其黨何虎詣章乞還川就撫章以廷瑞本川賊
恐恙之必致死陝且受惠遂令冕護之出境廷瑞既
入川求降鍾等令至東鄉聽撫賊意在緩師遷延累
月依山結營要求營山縣或臨江市屯其衆遣官爲
質鍾令漢中通判羅賢入其營本恕始來謁約既定

會官軍有殺其樵採者賊復疑懼遂殺賢剽掠如故
既而官軍爲七壘守之賊不得逸其黨漸潰廷瑞以
所掠女子詐爲已女結婚于永順王舍彭世麟莫得
間逸去世麟密白鐘鐘授方畧使圖之及期廷瑞本
怒暨其黨王金珠等二十八人咸來會伏發悉就禽
惟廖麻子得脫其衆聞變驚潰渡河鐘遣兵追擊俘
斬七百餘人以功進太子太保未幾麻子及其黨曹
甫肆掠營山蓬州七年總兵官楊宏副使張敏馬昊
何珊等合師擊之俘斬千三百餘人賊勢蹙鐘乃議
招撫敏以單騎詣甫營甫聽命遂赴軍門面受約束

歸散其黨而麻子忿甫背已殺之并其衆轉掠川東
勢復盛官軍不敢擊惟潛躡賊後賊所殺良民爲功
土兵虐民尤甚時有謠曰賊如梳軍如篦土兵如髮
於是巡按御史王綸紀功御史汪景芳劾鐘縱兵不
戢綸復奏鐘樂飲縱游致賊自合州渡江陷州縣詔
召鐘還以彭澤代鐘遂乞休歸嘉靖三年卒諡襄惠
馬昊本姓鄒字宗大寧夏人少孤傭書供母見武將
優禮諸生始發憤讀書家貧無膏火則就燈廟中巡
撫賈俊聞而資之昊益肆力遂舉弘治十二年進士
由行人遷御史正德初遷山東僉事坐巡按山西時

所舉屬吏犯贓謫真定推官境內數有盜吳教吏士
習射廣設方畧盜發輒獲先是給事中邵天和出覈
山西鹽課將還無以賄劉瑾與吳謀於運使李德仁
歛所屬二萬金以應未及輸瑾而爲偵事者所發吳
再謫判開州真定吏民伏闕請留乃免五年遷四川
僉事吳長身驍捷善騎射知兵時巨寇方四曹甫等
方熾洪鐘討之久無功吳至聞所部笑曰將不知兵
其何以戰於是擇健卒千分四隊隊各立長教之會
曹甫將襲江津吳從巡撫林俊進剿賊大敗俘斬及
焚死者二千餘人明年方四陷江津乘勝破綦江進

薄重慶。晁夜出百騎舉火擊賊。賊驚潰。相駘籍。晁以兵乘之。斬獲多。軍中皆賀。晁曰：「諸君尚未見大敵。何賀也？」雖然，且及鋒用之。遂合羅猶土兵直前搏賊。賊方陳左而伏兵於右。晁以正兵當左身，率百騎搗其伏。伏潰趨左，左亦潰。於是合擊焚其柵，大破之。四奔婺川。與甫不協，相攻擊，衆遂散。四變姓名，走開縣。爲他將所獲。於是晁再被獎賚。進副使，與總兵官楊宏擊敗曹甫。甫降。而其黨廖麻子併其衆，連陷銅梁、榮昌諸縣。晁及諸將吏坐停俸奪冠帶。是時洪鐘召還巡撫高崇熙，恒怯復主撫。潛使人與賊約降麻子等。

陽受約崇熙遽罷遣諸軍令副使張敏徙關縣臨江
市民空其地處之許給復三年爲請於朝昊力爭謂
臨江市蜀襟喉上達重叙下連湖湘地土饒衍奈何
棄之養虎自遺患崇熙不從昊乃益治兵觀變其明
年賊果執敏叛殺官軍數百人詔逮崇熙而擢昊右
僉都御史代之巡撫賊進圍中江將趨成都昊以五
千騎馳赴與總制彭澤合兵連敗之遊擊閻勲追擊
麻子斬之劔州餘衆走保西鄉山中推其黨喻思偉
爲主剽掠如故總兵官陳珣追至富村賊僞降因北
走陽平渡江襲殺都指揮姚震轉入巴山故巢尋出

走大安鎮珣軍不敢前而陝西兵與賊戰又敗潰賊
遂越寧羌犯略陽珣軍鼓譟恐賊賊乃夜走珣且追
且止賊遂度廣元爲官軍所遏還趨通巴招鄢藍餘
黨復集是時諸將率稱病不擊賊民兵復假賊名肆
劫掠於是詔逮珣且讓昊昊乃與彭澤督諸軍圍之
散降畧盡思倖走獲之西鄉山中昊復與澤討平內
江賊駱松祥部內羣盜悉靖錄功進副都御史十年
亦不剝冠松潘番人磨讓六少等乘機作亂爲之鄉
導西土大震昊招土番爲間發兵掩擊之千戶張倫
等夜率熟番攻破賊獲磨讓六少亦不剝遂遁去昊

以松滿地險阻者大往往邀劫饋運乃督叅將張傑
等修築塙柵自三舍堡至風洞關凡五十里賜勅褒
之烏蒙芒部并府壤接筇連珙縣圍軍千里山菁深
阻諸蠻楚人子羿子仲家子猶子猱格等謀居其中
有楚人子普法惡者通漢語曉符籙潛懷異志妄言
彌勒出世自稱蠻王誘煽諸夷作亂流民謝文禮謝
文義應之都指揮杜琮與戰敗績文義奪其冑僅以
身免十二年吳督指揮曹昱進討法惡大敗走保青
山砦吳分據水口絕其汲道關南方圍待之賊乏水
渴偵南圍薄薄暮突圍出官軍遮擊之俘斬千五百

餘人法惡中流矢死諸蠻大奔吳撫定之以功再進
右都御史蔭子錦衣世百戶吳有才氣能應變揮霍
自喜所向輒有功然官川中久狎其俗銳意欲立功
名卒以是敗先是亦不剌既遁吳移兵攻小東路番
砦未下茂州羣蠻懼見侵遂糾生苗攻圍城堡叅將
尚錫等討之兵敗指揮龐昇等皆死又嘗遣副總兵
張傑副使吳禮擊松潘南北二路番不利失亡軍士
三千餘人吳匿不以聞變蠻平吳不置戍守邊班師
請改高縣爲州設長吏增高珙筠連田租千八百石
令指揮魏武度由奪降人業給之軍民而珙縣知縣

步梁窺吳意誘殺降人阿尚杜琮以亡胄故怨文義
潛使人購其頭於是文義乘羣蠻怨嗾之遂大誼攻
高慶符二縣破其城琮率兵禦之又敗死傷七百人
自黎雅以西天全六番皆相繼亂南京給事中孫懋
暨巡按御史盧雍黎龍先後劾吳十四年遂遣官逮
吳行至河南䟽稱疾篤而使使厚賄兵部尚書王瓊
得留於家世宗即位始就逮尋削籍歸楊一清胡世
寧嘗薦之爲桂萼所駁而止久之卒

論曰明興盜賊之禍荼毒生靈至正德時已烈矣武
宗次第芟夷海內且晏然無事雖曰泰陵之餘澤亦

以運籌戮力之尚有人也如何鑑諸臣設施建立不
無互有短長而馳驅疆場皆不可謂非干城之選矣
不然揭竿遍野而東鉞無人即覆亡之禍奚必在莊
烈之世哉